



---

**KERATAN AKHBAR  
DAN MEDIA ONLINE  
UNTUK MAKLUMAN :**

**Y.B. MENTERI  
Y.B. TIMBALAN MENTERI  
Y.BHG. KSU  
Y.BHG. TKSU (PDN)  
Y.BHG. TKSU (PUP)  
SETIAUSAHA AKHBAR**

---

**10 JANUARI 2022 (ISNIN)**



---

# **KERATAN AKHBAR DAN MEDIA ONLINE (KPDNHEP)**

---

**10 JANUARI 2022 (ISNIN)**

## Harga ayam tak patut naik

**HARGA** ayam dan telur di pasaran tempatan dijangka meningkat selepas Skim Harga Maksimum Keluarga Malaysia (SHMKM) tamat 4 Februari ini.

Menteri Perdagangan Dalam Negeri dan Hal Ehwal Pengguna, Datuk Seri Alexander Nanta Linggi baru-baru ini berkata, langkah terbabit terpaksa diambil sebagai mengimbangi situasi 'menang-menang' antara kumpulan pengguna dan penternak di negara ini.

Ketika ini harga runcit maksimum ayam bulat adalah RM9.10 sekilogram.

Ayam yang merupakan sumber protein utama rakyat Malaysia menyaksikan kenaikan mendadak tahun lalu. Daripada kira-kira RM7 sekilogram pada bulan Julai, harganya terus naik sehingga lebih RM10 sekilogram sebelum SHMKM dilaksanakan.

SHMKM melibatkan 12 jenis barangan khususnya telur, ayam dan sayuran diperkenalkan dari 7 Disember hingga 31 Disember lalu. Ia kemudian dilanjutkan lagi sehingga 4 Februari depan iaitu selepas sambutan Tahun Baharu Cina.

Sepanjang tempoh SHMKM, kerajaan memberi kebenaran kepada syarikat tertentu untuk mengimport ayam bulat sejuk beku sehingga 10,000 tan metrik atau 5.5 juta ekor sebulan.

Purata keperluan ayam dalam negara adalah sebanyak dua juta ekor sehari atau 62.9 juta ekor sebulan seperti didedahkan Menteri Pertanian dan Industri Makanan, Datuk Seri Dr Ronald Kiandee, Disember lalu.

Bagaimanapun, harga ayam dikatakan tidak benar-benar dapat diturunkan apabila harga ayam dari luar negara juga mahal disebabkan kos penghantaran yang tinggi serta nilai ringgit yang lemah.

Pada masa sama, ramai penternak tempatan, pemborong dan peruncit menyuarakan ketidakmampuan mereka menanggung kerugian atas kenaikan kos pengeluaran dan operasi.

Walaupun kerajaan mahu mewujudkan situasi menang-menang, rata-rata reaksi rakyat mengatakan harga ayam tidak patut naik lebih-lebih lagi menjelang Ramadan tidak sampai tiga bulan lagi.

Lebih daripada itu, sesetengah rakyat berpendapat tugas menteri sepatutnya mencari jalan penyelesaian ke atas masalah rakyat, bukannya menyuruh rakyat bersedia harga barang akan naik.

Justeru, kerajaan dan pihak industri harus mencari jalan penyelesaian jangka panjang untuk menstabilkan harga ayam.

## Laksanakan subsidi kepada penternak ayam

**SHAH ALAM** - Kerajaan digesa melaksanakan sistem subsidi terhadap penternak yang membekalkan ayam dalam pasaran tempatan sebagai inisiatif mengawal kenaikan harga ayam.

Menurut peniaga ayam yang hanya mahu dikenali sebagai Azizan, jika isu makanan ayam import menjadi punca kenaikan harga ayam di pasaran, kerajaan seharusnya memainkan peranan memberi subsidi kepada penternak agar harga ayam kekal dan tidak membebankan pengguna.

Katanya, isu tersebut wajar dibincangkan secara lebih mendalam antara kerajaan terutamanya Kementerian Perdagangan Dalam Negeri dan Hal Ehwal Pengguna (KPDNHEP) bersama peniaga, penternak dan peladang.

"Duduk semeja dan cari jalan penyelesaian yang terbaik. Tetapi saya juga tidak menolak kemungkinan wujud unsur manipulasi harga oleh penternak yang sebenarnya mahukan subsidi makanan ayam daripada kerajaan," katanya kepada *Sinar Harian*.

Pada Jumaat, Menteri KPDNHEP, Datuk Seri Alexander Nanta Linggi memaklumkan, rakyat negara ini perlu bersedia dengan kenaikan harga siling ayam yang dijangka berlaku awal bulan depan selepas tamat Skim Harga Maksimum Keluarga Malaysia (SHMKM).

Sementara itu, peniaga ayam di Pasar Seksyen 16 di sini, Sazali Ramli berkata, selain harga makanan, kos sampingan untuk menternak ayam juga makin naik.

"Kerajaan mungkin boleh beri subsidi untuk kurangkan harga makanan ayam sebab apabila harga makanan ayam turun, secara automatik ia akan menurunkan kos kepada peniaga. Jadi peniaga boleh jual pada harga yang lebih murah," jelasnya.



Peniaga ayam menyarankan kerajaan melaksanakan sistem subsidi terhadap makanan haiwan ternakan itu bagi mengurangkan kos penternakan sekaligus harga ayam di pasaran akan stabil.



FAMA jamin jualan barangan mentah lebih rendah, tidak bebankan pengguna

## Harga ayam di pasar tani berpatutan

OLEH MOHAMAD HAFIZI  
MOHD. SAID

**PASIR SALAK** – Lembaga Pemasaran Pertanian Persekutuan (FAMA) memberi jaminan harga barangan dan bahan mentah termasuk ayam yang dijual di pasar tani lebih berpatutan.

Pengerusinya, Datuk Mohd. Fasih Mohd Fakeh berkata, peniaga dan usahawan boleh terus memasarkan hasil pertanian mereka selain disaran mengambil bekalan terus dari ladang tanpa melalui orang tengah.

Katanya, menerusi jualan secara terus dari ladang, peniaga dan usahawan dapat mengahpuskan orang tengah yang selama ini mendapat keuntungan sekitar 20 hingga 30 peratus.

"Dari segi kawalan harga, ia di bawah Kementerian Perdagangan Dalam Negeri dan Hal Ehwal Pengguna (KPDNHEP).

"Kita cuma berharap kalau boleh peniaga dapat mengambil hasil terus dari ladang untuk jual di pasar tani FAMA agar harga lebih rendah.

"Seperti contoh ayam yang diambil dari ladang boleh dijual



FAMA memberi jaminan harga jualan bahan mentah termasuk ayam di pasar tani di seluruh negara pada kadar berpatutan. – GAMBAR HIASAN

pada harga RM6 hingga RM7 sekilogram," katanya.

Mohd. Fasih berkata demikian kepada pemberita se-

lepas mengadakan lawatan kerja ke Program My Rakyat dan Pasar Tani Kekal (PTK) Kampung Gajah, di sini, semalam.

Turut sama pada lawatan berkenaan, Ahli Parlimen Pasir Salak, Datuk Seri Tajuddin Abdul Rahman, Timbalan Ketua

Pengarah (Operasi) FAMA, Abdul Rashid Bahri dan Pengarah FAMA Perak, Norsham Ramly.

Sementara itu, Mohd. Fasih berkata, PTK Kampung Gajah akan memulakan operasinya pada Mac depan dengan menempatkan 91 unit iaitu 14 unit lot basah dan 70 unit lot kering serta tujuh unit medan selera.

Tambahnya PTK yang menelan kos projek bernilai RM2.6 juta itu akan beroperasi bermula pukul 7 pagi hingga 6 petang setiap hari dengan anggaran penajaan ekonomi bagi tahun pertama pengoperasian PTK berkenaan adalah sebanyak RM11 juta.

"90 peratus peniaga di PTK ini adalah dari daerah Perak Tengah dengan perpindahan keseluruhan peserta dari Pasar Awam Kampung Gajah ke PTK tersebut," katanya.

Menurut Mohd. Fasih, selain Kampung Gajah, terdapat dua lagi PTK di negeri ini iaitu di Manjung dan Lekir yang telah beroperasi sejak beberapa tahun lalu serta PTK Kuala Kangsar yang dijangka beroperasi sepe-nuhnya pada 2023.

Senarai Harga Barang Keperluan	
• Ayam	<b>RM7.99</b>
• Daging Lembu Tempatan	<b>RM45</b>
• Daging Lembu Import	<b>RM28</b>
• Telur Gred A	<b>RM12.30</b>
• Ikan Kembung	<b>RM16.99</b>
• Minyak Masak	<b>RM6.50</b>
• Gula Pasir	<b>RM2.85</b>
• Bawang Besar Holland	<b>RM1.80</b>
• Bawang Putih	<b>RM5.49</b>
• Cili Merah	<b>RM9.99</b>
• Kubis Bulat Tempatan	<b>RM2.79</b>
• Tepung Gandum	<b>RM2.20</b>

\*Harga (RM/kg) Sumber: KPDNHEP